

## ԿԱՐԾԻՔ

Ը.00.08 «Մաթեմատիկական տնտեսագիտություն» մասնագիտությամբ տնտեսագիտության թեկնածուի գիտական աստիճանի հայցման համար ներկայացված Գոռ Արայիկի Խաչատրյանի «Պետական պարտքի կառավարման ստրատեգիաներ (ՀՀ օրինակով)» թեմայով ատենախոսության վերաբերյալ

### Ատենախոսության թեմայի արդիականությունը

Պետական պարտքի կառավարման ստրատեգիաների մշակումն ու իրացումը համարվում է պետական պարտքի քաղաքականության անկյունաքարը: Պետական պարտքի կառավարումը ենթադրում է ստրատեգիաների մշակման և կիրառման միջոցով կառավարության ընթացիկ ծախսերի ֆինանսավորման համար անհրաժեշտ միջոցների ներգրավման պրոցես, ինչի ընթացքում պահպանվում են ռիսկի և ծախսի սահմանված թիրախները, ինչպես նաև բավարարվում են կառավարության կողմից նախանշված այլ նպատակներ, այնպիսին, ինչպիսին է՝ կառավարության արժեթղթերի արդյունավետ շուկայի ձևավորում և զարգացում:

Վերջին տասնամյակներում առկա է պետական պարտքի արդյունավետ կառավարման խիստ ընդգծված պահանջ, ինչն առավելապես կարևորվում է համաշխարհային, ինչպես նաև Հայաստանի Հանրապետության պետական պարտքի պաշարի ցուցանիշի անընդհատ աճի միտման ենթատեքստում: Պետական պարտքի քաղաքականության արդյունավետության բարձրացումը կարևորվում է նաև կայուն մակրոտնտեսական միջավայրի ձևավորման անհրաժեշտությամբ և երկարաժամկետ հատվածում տնտեսական զարգացման տեսանկյունից պարտքի արդյունավետ կառավարմանը վերապահված նշանակալի դերակատարմամբ: Ի հեճուկս պարտքի արդյունավետ կառավարմանը, պետական պարտքի կառավարման ոչ արդյունավետ ռազմավարության կիրառման պարագայում ռիսկի է ենթարկվում մակրոտնտեսական միջավայրի կայունության ապահովումը: Բացի այդ, պարտքի ոչ արդյունավետ կառավարմամբ երկիրը բացասական ազդակներ է ուղարկում միջազգային ներդրողներին, ինչը, վնասելով կառավարության հեղինակությունը և վարկունակությունը, կարող է հանգեցնել պարտքի ներգրավման ծախսերի ավելացմանը:

Վերոգրյալից բխում է պետական պարտքի կառավարման արդյունավետության բարձրացման նպատակով պարտքի էֆեկտիվ և արդիական ստրատեգիաների մշակման և կիրառման անհրաժեշտությունը, ինչն էլ հաստատում է սույն ատենախոսության թեմայի արդիականությունը:

### Ատենախոսության նպատակը և խնդիրները

Հետազոտության հիմնական նպատակն է հանդիսանում ՀՀ պետական պարտքի կառավարման տեսանկյունից գործնական կիրառություն ունեցող

ստրատեգիաների առաջադրումը, որոնք կարող են նշանակալիորեն բարձրացնել պարտքի կառավարման արդյունավետությունը: Այս նպատակին հասնելու համար ստենախոսության շրջանակներում դիտարկվում են երկու հիմնական ուղղվածություններ: Առաջինը՝ պետական պարտքի կառավարման արդյունավետության բարձրացում պարտքի վերակազմավորման միջոցով, ինչի համար դիտարկվում են երկու տիպի ֆիքսված եկամտով արժեթղթեր՝ հասարակ արժեկտրոնային պարտատոմս և մասնակի մարումներով արժեկտրոնային պարտատոմս: Երկրորդ՝ այլընտրանքային ուղղվածությունն է արտահանման խթանման միջոցով պետական պարտքի կառավարման արդյունավետության բարձրացման քաղաքականությունը:

Ստենախոսության նպատակի իրագործման համար դրվել են հետևյալ խնդիրները՝

- ❖ հետազոտել հասարակ արժեկտրոնային և մասնակի մարումներով արժեկտրոնային պարտատոմսերի մինչև մարում եկամտաբերությունների միջև կապը՝ սփոթ կորի տարբեր տեսքերի և պարտատոմսերի պարամետրերի հավասարության ենթադրության պայմաններում,
- ❖ պարտատոմսերի պարամետրերի հավասարության և համահարթ սփոթ կորի ենթադրության ներքո ներկայացնել հասարակ արժեկտրոնային պարտատոմսի և մասնակի մարումներով արժեկտրոնային պարտատոմսի գների միջև ֆունկցիոնալ կապը,
- ❖ սահմանել հասարակ արժեկտրոնային պարտատոմսի և մասնակի մարումներով արժեկտրոնային պարտատոմսի Մաքուլիի դյուրացիաների միջև կապը,
- ❖ սահմանել հասարակ արժեկտրոնային պարտատոմսի և մասնակի մարումներով արժեկտրոնային պարտատոմսի ձևափոխված դյուրացիաների միջև կապը,
- ❖ ՀՀ տնտեսության օրինակով, գնահատելով կարճաժամկետ և երկարաժամկետ հատվածներում իրական արդյունավետ փոխարժեքի և փոխարժեքի տատանողականության նկատմամբ արտահանման էլաստիկության գործակիցները, քննության առնել պարտքի կառավարման քաղաքականության արդյունավետության բարձրացման հնարավորությունը ազգային արժույթի արժեզրկմամբ արտահանման խթանման քաղաքականության միջոցով:

#### **Ստենախոսության հիմնական գիտական արդյունքները և նորույթը**

Ստենախոսության հիմնական գիտական արդյունքներն են՝

- ❖ Նելսոն-Միգելի մոդելի միջոցով և թվային մեթոդների կիրառմամբ սահմանվում է հասարակ արժեկտրոնային պարտատոմսի և մասնակի մարումներով արժեկտրոնային պարտատոմսի մինչև մարում եկամտաբերությունների միջև կապը,
- ❖ ձևակերպվում և ապացուցվում է թեորեմ, ինչը սահմանում է հասարակ



արժեկտրոնային և մասնակի մարումներով արժեկտրոնային պարտատոմսերի գների միջև ֆունկցիոնալ կապը՝ համահարթ սփռթ կորի և պարտատոմսերի պարամետրերի հավասարության ենթադրության պայմաններում,

❖ որոշ ենթադրությունների ներքո ձևակերպվում և ապացուցվում են թեորեմներ, որոնք սահմանում են հասարակ արժեկտրոնային և մասնակի մարումներով արժեկտրոնային պարտատոմսերի դյուրացիաների միջև կապը,

❖ Հայաստանի տնտեսության օրինակով, պարտքի կառավարման տեսանկյունից արտահանմանը վերապահված առանցքային դերակատարման համատեքստում, էկոնոմետրիկ և վիճակագրական մեթոդների կիրառման միջոց գնահատվում են արտահանման հավասարման մի քանի սպեցիֆիկացիաներ,

❖ ատենախոսության շրջանակներում ստացված գիտական արդյունքների հիման վրա առաջադրվում են պարտքի կառավարման ստրատեգիաներ:

### Ատենախոսության կառուցվածքը և հիմնական բովանդակությունը

Ատենախոսությունը բաղկացած է ներածությունից, երեք գլխից, եզրակացությունից և օգտագործված գրականության ցանկից:

Ատենախոսության **ներածությունում** հիմնավորվում է հետազոտության արդիականությունը, ամփոփ շարադրվում են աշխատանքի հիմնական նպատակը և խնդիրները, հետազոտության օբյեկտը և առարկան, աշխատանքի տեսական, մեթոդական ու տեղեկատվական հիմքերը, հիմնական արդյունքները և գիտական նորույթը: Ներածությունում ներկայացվում են նաև ատենախոսության արդյունքների գործնական նշանակությունը, ատենախոսության կառուցվածքն ու ծավալը:

Ատենախոսության **առաջին գլխում** ներկայացվում են որոշ զարգացած երկրների կենտրոնական բանկերի և պարտքի կառավարման գործակալությունների կողմից պետական պարտքի ռազմավարության և ստրատեգիաների մշակման նպատակով կիրառվող ստոխաստիկ սիմուլյացիոն մոդելները:

Ատենախոսության **երկրորդ գլխում** հասարակ արժեկտրոնային և մասնակի մարումներով արժեկտրոնային պարտատոմսերի պարամետրերի հավասար լինելու ենթադրության պայմաններում հետազոտվում է պարտատոմսերի մինչև մարում եկամտաբերությունների համատեղ վարքագիծը՝ սփռթ կորի տարբեր տեսքերի դեպքում: Երկրորդ գլխում սսահմանվում է պարտատոմսերի գների միջև ֆունկցիոնալ կապը՝ պարտատոմսերի պարամետրերի հավասարության և համահարթ կորի ենթադրության պայմաններում: Հետազոտվում է նաև հասարակ արժեկտրոնային և մասնակի մարումներով արժեկտրոնային պարտատոմսերի դյուրացիաների միջև կապը: Ստացված արդյունքների հիման վրա առաջարկվում է պետական պարտքի կառավարման ստրատեգիա:

Երրորդ գլխում քննության է առնվում պարտքի կառավարման քաղաքականության արդյունավետության բարձրացման այլընտրանքային եղանակ՝ հենված ազգային արժույթի արժեզրկման միջոցով արտահանման խթանման

քաղաքականության վրա: Երրորդ գլխում ներկայացվում են էկոնոմետրիկ մեթոդների կիրառման միջոցով արտահանման հավասարման տարբեր սպեցիֆիկացիաների գնահատման արդյունքները, որոնք հիմք են հանդիսանում պետական պարտքի կառավարման ստրատեգիայի մշակաման համար:

Ատենախոսության եզրակացություններ բաժնում ամփոփված են ատենախոսական աշխատանքի հիմնական արդյունքները:

### Ատենախոսության արդյունքների տեսական և գործնական նշանակությունը

Ատենախոսության հիմնական արդյունքներն ունեն հետևյալ կիրառելիությունները՝

- ❖ կարող են օգտագործվել ՀՀ պետական պարտքի կառավարման քաղաքականության մշակման նպատակով,
- ❖ կարող են կիրառվել պարտատոմսերից կազմված պորտֆելների կառուցման նպատակով,
- ❖ կարող են օգտագործվել պարտատոմսերից կազմված պորտֆելների ռիսկերի կառավարման նպատակով,
- ❖ կարող են հիմք հանդիսանալ այլ հետազոտական աշխատանքների համար:

### Դիտողություններ

Ատենախոսությունը հանդիսանում է ծավալուն հետազոտական աշխատանք, որի շրջանակներում ստացվել են կարևոր գիտական նշանակության արդյունքներ: Այնուամենայնիվ, ատենախոսության վերաբերյալ առկա են որոշ դիտողություններ և առաջարկություններ՝

1. Ատենախոսության 2.2 ենթագլխում հասարակ արժեկտրոնային պարտատոմսի և մասնակի մարումներով արժեկտրոնային պարտատոմսի մինչև մարում եկամտաբերությունների միջև կապը սահմանելու նպատակով թվային մեթոդների կիրառմամբ մշակվել է եռաքայլ ալգորիթմ, որի երրորդ քայլով սիմուլյացված տվյալների վրա, կիրառելով գծային ինտերպոլացիայի մեթոդը, գնահատվում են համապատասխան ինտերպոլանտները: Վերլուծությունը կշահեր, եթե գծային ինտերպոլացիայի մեթոդից բացի կիրառվեր նաև գծային ռեգրեսիոն մեթոդը:

2. Ատենախոսության 3-րդ գլխում գնահատվում են արտահանման հավասարման թվով վեց մոդելներ, որոնք գծային ռեգրեսիոն հավասարումներ են: Նմանօրինակ խնդիրներում առավել տարածված մոտեցումներից է օգտագործել VAR և SVAR մոդելները: Եթե մոդելներում որպես անկախ փոփոխական դիտարկվեր օրինակ պղնձի միջազգային գինը՝ պայմանավորված հանգամանքով, որ Հայաստանի ապրանքային արտահանման զգալի մասը կազմում է պղնձի խտանյութը, ապա VAR և SVAR մոդելների կիրառումը առավել անհրաժեշտ կլինեին: Բացի այդ,



աշխատանքը կշահեր, եթե մոդելներում որպես անկախ փոփոխական դիտարկվեին ապրանքների միջազգային գները:

3. Ատենախոսության 3.2.5 ենթազխում արտահանման բազային հավասարման (մոդել 1) հիման վրա, օգտագործելով ուղինգ ռեգրեսիայի մեթոդը, գնահատվում է իրական արդյունավետ փոխարժեքի նկատմամբ արտահանման էլաստիկության գործակցի դինամիկան: Վերլուծությունը կշահեր, եթե ուղինգ ռեգրեսիան կիրառվեր այլ ռեգրեսիոն մոդելների համար ևս:

### Եզրակացություն

Ընդհանուր առմամբ, դիտողությունները միտված են հետազոտական աշխատանքի շարունակականության ապահովման խրախուսմանը և հետագա հետազոտական ուղղությունների առաջադրմանը: Վերոշարադրված դիտողություններն ընդհանրապես չեն նվազեցնում ատենախոսական աշխատանքի գիտական արժեքը:

Գոռ Արայիկի Խաչատրյանի ատենախոսությունը ինքնուրույն, ամբողջական հետազոտություն է, որն ունի գիտական նշանակալի արժեք: Ատենախոսության արդյունքներն ունեն թե՛ տեսական, թե՛ գործնական բնույթ, ու դրանց կիրառումը կարող է նպաստել ՀՀ պարտքի կառավարման էֆեկտիվությանը:

Սեղմագիրը համապատասխանում է ատենախոսության բովանդակությանը և ներառում աշխատանքի հիմնական դրույթներն ու արդյունքները: Հեղինակի հետազոտության հիմնական արդյունքները տպագրված են թվով 3 (երեք) գիտական հոդվածներում, որոնցից 2-ը (երկուսը) Scopus շտեմարանում ընդգրկված միջազգային հեղինակավոր գիտական պարբերականներում:

Գոռ Արայիկի Խաչատրյանի «Պետական պարտքի կառավարման ստրատեգիաներ (ՀՀ օրինակով)» թեմայով ատենախոսությունը համապատասխանում է Հայաստանի Հանրապետությունում գիտական աստիճանաշնորհման կանոնակարգի 6-րդ և 7-րդ կետերի, ինչպես նաև թեկնածուական ատենախոսություններին ներկայացվող պահանջներին, իսկ հեղինակն արժանի է Ը.00.08 «Մաթեմատիկական տնտեսագիտություն» մասնագիտությամբ տնտեսագիտության թեկնածուի գիտական աստիճանի շնորհմանը:

Պաշտոնական ընդիմախոս  
տնտեսագիտության թեկնածու

Ե. Հակոբյանի ստորագրությունը հաստատում էմ  
պ.գ.թ., ԵՊՀ գիտական քարտուղար



Ե. Հակոբյան

Լ. Հովսեփյան

18 սեպտեմբերի 2020թ.